

## REGLUGERÐ

### um skipun hjálparliðs almannavarna.

#### 1. gr.

Almannavarnanefndir fara með skipulagningu hjálparliðs almannavarna, hver í sínu umdæmi, eftir því, sem nánar segir í reglugerð þessari.

#### 2. gr.

Lögreglustjóri skipar í hjálparlið að fengnum tillögum almannavarnanefndar, og er hverjum manni á aldrinum 18—65 ára skylt að gegna án endurgjalds starfi í hjálparliði almannavarna í umdæmi, þar sem hann dvelst.

Ákvörðun lögreglustjóra um skipun í hjálparlið má skjóta til dómsmálaráðherra.

Ef hættu vofir yfir eða tjón hefur orðið, má kveðja hvern mann 16 ára og eldri, sem tiltækur er, til tafarlausrar aðstoðar við hjálparlið.

#### 3. gr.

Almannavarnanefnd sér um þjálfun hjálparliðs í umdæmi sínu, og fer um þjálfun eftir starfsreglum, sem forstöðumaður almannavarna setur.

Hver, sem starfar í hjálparliði, er skyldur að taka þátt í námskeiðum og æfingum, sem hann hefur verið kvaddur til, og ber honum að hlýða fyrir mælum og fara eftir starfsreglum.

#### 4. gr.

Almannavarnir ríkisins halda námskeið fyrir yfirmenn og leiðbeinendur í hjálparliði.

#### 5. gr.

Sá, sem starfar í hjálparliði, á rétt á bótum vegna meiðsla eða tjóns, sem hann kann að verða fyrir í slíku starfi.

#### 6. gr.

Hjálparlið almannavarna skal aðstoða við eftirtalin verkefni: eldvarnir, björgun og sjúkraflutninga, ruðningsstarf, hjálparstarf vegna tjóns af völdum geislavirkni, sýkla eða eiturefna, löggæzlu, fjarskiptabjónustu og félagslegt hjálparstarf.

#### 7. gr.

Heimilt er almannavarnanefnd, meðan skipun hjálparliðs og þjálfun er á byrjunarstigi, að fresta skipulagningu og þjálfun hjálparliðs, að því er tekur til einstakra verkefna, samkvæmt 6. gr.

#### 8. gr.

Stærð hjálparsveita skal vera sem hér segir:

Í umdæmi með allt að 3500 íbúa ekki færri en 35 menn, í umdæmi með 3500—6000 íbúa ekki færri en 60 menn, í umdæmi með 6000—10000 íbúa ekki færri en 100 menn, og síðan 100 manna sveit á hverja 10 000 íbúa.

Almannavarnanefnd ákveður tölu manna í hjálparsveitum, en heimilt er henni með sérstöku samþykki almannavarnaráðs að hafa hjálparsveit fámennari en gert er ráð fyrir í 2. mgr.

#### 9. gr.

Forstöðumaður almannavarna veitir leiðbeiningar um starfsskiptingu innan hverrar hjálparsveitar, svo og um lágmarksbúnað hjálparliðs, en að öðru leyti kveður almannavarnanefnd á um þessi atriði.

## 10. gr.

Heimilt er almannavarnanefnd að semja við starfandi björgunarsveitir áhugamanna um að annast ákveðin verkefni á sviði almannavarna.

## 11. gr.

Reglugerð þessi, sem sett er samkvæmt 9. gr. laga nr. 94/1962, sbr. 4. gr. laga nr. 30/1967, öðlast gildi þegar í stað.

*Dóms- og kirkjumálaráðuneytið, 25. apríl 1969.*

**Jóhann Hafstein.**

*Ólafur W. Stefánsson.*

29. apríl 1969.

Nr. 108.

**Staðfesting forsetans** á skipulagsskrá fyrir Minningarsjóð Mortens Hansen, skólastjóra, útgefin á venjulegan hátt að mandatum af dómsmálaráðherra 29. apríl 1969.

Skipulagsskráin er þannig:

## SKIPULAGSSKRÁ

fyrir minningarsjóð Rasmus Mortens Hansen, skólastjóra.

## 1. gr.

Sjóðurinn nefnist Minningarsjóður Mortens Hansen, skólastjóra.

## 2. gr.

Sjóðurinn var stofnaður árið 1923 af kennurum Barnaskóla Reykjavíkur. Nú er sjóðurinn kr. 22 902.19 í Sparisjóði Landsbankans, bók nr. 22571.

## 3. gr.

Tilgangur sjóðsins er að efla áhuga nemenda Miðbæjarskólans á lesgreinum þ. e. landafræði, náttúrufræði, kristnum fræðum og sögu.

Árlega skal veita einum eða fleiri nemendum í 6. bekk, þ. e. við barnapróf, verðlaun eða viðurkenningu fyrir ritgerðir um efni úr framantöldum greinum.

Ritgerðirnar skulu samdar í skólanum fyrir lok aprilmánaðar. Nemendur fá að velja um þrjú verkefni í hverri grein. Stjórn sjóðsins ákveður á hverju ári, hvort ritgerðarverkefni skulu vera úr öllum greinunum eða jafnvel aðeins úr einni þeirra.

Við úthlutun verðlauna og viðurkenningar má taka tillit til vinnubóka og próf-einkunna.

## 4. gr.

Til verðlauna skal verja sem næst  $\frac{3}{4}$  af vöxtum sjóðsins.

## 5. gr.

Stjórn sjóðsins skipa skólastjóri Miðbæjarskólans og tveir af kennurum skólans, sem 6. bekkjar kennarar þess árs, er um ræðir, kjósa.

Kosning skal fara fram fyrir 1. okt.

Stjórnin úthlutar verðlaununum.